

Uhapšena braća Lijanovići

Uhapšeni su Jerko Ivanković-Lijanović, ministar poljoprivrede vodoprivrede i šumarstva Federacije Bosne i Hercegovine (FBiH) i njegov brat Mladen, poslanik Predstavničkog doma Parlamentarne skupštine BiH, potvrđeno je iz državnog tužilaštva, po čijem je nalogu uhićenje i izvršeno.


U akciji kodnog naziva "Meso", koja se provodi u suradnji sa Državnom agencijom za istrage i zaštitu (SIPA), zbog sumnje na organizirani kriminal i poreznu utaju, uhapšeni su i njihova braća: Slavko i Jozo Ivanković-Lijanović te otac Stipe-Lijan Ivanković. Pored toga, policija je uhapsila još devet osoba među kojima su i federalni ministar trgovine Milorad Bahilj, te Jozo Slišković, Venka Ivanković, Željko Mikulić, Zdravo Ivanković, Draženko Kvesić, Miroslav Čolak, Mirjana Šakota i Mirko Galić.

U okviru akcije izvršeni su pretresi i izuzimanje dokumentacije i dokaznih materijala iz poduzeća: „Lijanovići“ d.o.o. Široki Brijeg, „Kora- fin“ d.o.o. Široki Brijeg, „Velmos Company“ d.d. Mostar.

Istraga protiv obitelji Lijanović vodi se od prošle godine nakon prijave koju je protiv njih podnijela Uprava za indirektno oporezivanje BiH (UIO), zbog sumnje da su počinili krivično djelo osnivanje i fiktivno gašenje preduzeća na osnovu čega su izbjegavali plaćanje poreza.

Novinari Centra za istraživačko novinarstvo (CIN) došli su u posjed [izvještaja](#) koji je UIO prosljedila državnom tužilaštvu krajem marta 2013. godine. U izvještaju se iznosi sumnja da su firme MI-MO Mostar, „Mesna industrija Farmer“ Široki Brijeg, „Farmko“ Široki Brijeg, Z.D.I. „Produkt“ Široki Brijeg i „Laktat“ Posušje, izbjegavajući platiti porez na dodanu vrijednost, oštetile državni budžet za više miliona maraka.

Shema povezanosti firmi u Izvještaju Uprave za



anije BiH.

Te su firme, kako se zaključuje u Izvještaju UIO BiH, povezane sa preduzećem „Lijanovići“ iz Širokog Brijega, čiji je suvlasnik Jerko Ivanković-Lijanović, predsjednik Narodne stranke Radom za boljitak i dopremijer Federacije BiH.

Inspektori UIO BiH su ovih pet firmi povezali sa preduzećem „Lijanović“ na osnovu ugovora o iznajmljivanju objekata klaonice sa opremom za proizvodnju, pogona za preradu mesa i mesnih prerađevina sa kompletnom opremom te na osnovu ugovora o licenci koje je kompanija „Lijanović“ potpisivala sa osumnjičenim firmama.

Inspektori sumnjaju da preduzeće „Lijanović“ d.o.o. vrši osnivanje pravnih lica koja se formalno vode kao vlasnici, odnosno korisnici određene pokretne i nepokretne imovine. Nakon što bi jedna od osnovanih firmi napravila dug po osnovu poreza, prestajala bi sa radom. Potom bi se osnivala nova firma, a scenario bi se ponavljao. Kako te firme nisu raspolagale vlastitom imovinom, UIO nije mogao izvršiti prinudnu naplatu duga.

Nakon ispitivanja osumnjičenih, postupajući tužitelj donijet će odluku o pokretanju prijedloga za određivanje mjere pritvora ili mjera zabrane u skladu sa zakonom.